

ЎЗБЕКИСТОН РЕСПУБЛИКАСИ ХАЛҚ ТАЪЛИМИ ВАЗИРЛИГИ
ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИ
ХУЗУРИДАГИ ДАВЛАТ ТЕСТ МАРКАЗИНИНГ
ҚАРОРИ

397 Футбол бўйича давлат ихтисослаштирилган мактаб-интернатларига ўқувчилар қабул қилиш тартиби тўғрисидаги низомни тасдиқлаш ҳақида

Ўзбекистон Республикаси Адлия вазирлиги томонидан 2009 йил 30 августда рўйхатдан ўтказилди, рўйхат рақами 2001

(2009 йил 9 сентябрдан кучга киради)

Ўзбекистон Республикаси Вазирлар Маҳкамасининг 2008 йил 7 августдаги «Айрим фанлар чуқур ўрганиладиган давлат ихтисослаштирилган умумтаълим муассасалари фаолиятини такомиллаштириш тўғрисида»ги 173-сон қарорининг 5-бандига мувофиқ Ўзбекистон Республикаси Халқ таълими вазирлиги ва Вазирлар Маҳкамаси хузуридаги Давлат тест маркази **қарор қилади:**

1. Футбол бўйича давлат ихтисослаштирилган мактаб-интернатларига ўқувчилар қабул қилиш тартиби тўғрисидаги низом иловага мувофиқ тасдиқлансин.
2. Мазкур қарор Ўзбекистон Республикаси Адлия вазирлигида давлат рўйхатидан ўтказилгандан ўн кундан сўнг кучга киради.

Халқ таълими вазири

Ғ. ШОУМАРОВ

Тошкент ш.,
2009 йил 19 август,
31-сон

**Вазирлар Маҳкамаси хузуридаги
Давлат тест маркази директори**

Б. ИСМОИЛОВ

Тошкент ш.,
2009 йил 19 август,
25/ҚҚ-сон

Ўзбекистон Республикаси
Халқ таълими вазирлиги ва Давлат тест
марказининг 2009 йил 19 августдаги
31, 25/ҚҚ-сонли қўшма қарорига
ИЛОВА

Футбол бўйича давлат ихтисослаштирилган мактаб-интернатларига ўқувчилар қабул қилиш тартиби тўғрисидаги НИЗОМ

Мазкур Низом Ўзбекистон Республикаси Вазирлар Маҳкамасининг 1998 йил 13 майдаги 203-сон «Ўзбекистон Республикасида умумий ўрта таълимни ташкил этиш тўғрисида»ги ва 2008 йил 7 августдаги 173-сон «Айрим фанлар чуқур ўрганиладиган давлат ихтисослаштирилган умумтаълим муассасалари фаолиятини такомиллаштириш тўғрисида»ги қарорларига мувофиқ футбол бўйича давлат ихтисослаштирилган мактаб-интернатларига (кейинги ўринларда мактаб-интернат деб юритилади) ўқувчиларни қабул қилиш тартибини белгилайди.

I. Умумий қоидалар

1. Мактаб-интернатга жисмоний жиҳатдан тайёрланган, футболга қобилияти бўлган, умумтаълим мактабининг 4-синфини тугатган (10-11 ёш) футбол билан шуғулланган, танлов имтиҳонларидан муваффақиятли ўтган ўқувчилар танлов натижалари асосида қабул қилинади.

2. Мактаб-интернатнинг асосий вазифаси истеъдодли ва иқтидорли болаларни аниқлаш, қўллаб-қувватлаш, ўқитиш, тарбиялаш ва уларнинг индивидуал хусусиятларини ривожлантириш, футбол соҳасида спорт қобилиятини шакллантиришга ва энг тўлиқ даражада амалга оширишга қўмаклашувчи муҳит яратиш, футбол бўйича республикамизда фаолият кўрсатаётган жамоалар учун муносиб спортчилар тайёрлашдан иборат.

II. Ҳужжатларни қабул қилиш тартиби

3. Мактаб-интернатга ўқувчиларнинг ҳужжатларини қабул қилиш ва танлов имтиҳонларида иштирок этувчи ўқувчилар рўйхатини шакллантириш учун мактаб-интернатларида қабул ҳайъати тузилади.

4. Қабул ҳайъати таркиби Қорақалпоғистон Республикаси Халқ таълими вазири, вилоятлар халқ таълими бошқармалари ва Тошкент шаҳар халқ таълими бош бошқармаси бошлиқлари томонидан тасдиқланади ва улар айни вақтда қабул ҳайъати раиси ҳисобланадилар. Қабул ҳайъати таркибини Ўзбекистон Республикаси Халқ таълими вазирлиги, Маданият ва спорт ишлари вазирлиги, Ўзбекистон футбол Федерацияси ҳамда Соғлиқни сақлаш вазирлигининг ҳудудий органлари вакиллари ташкил этади.

5. Мактаб-интернат директори ҳайъатнинг масъул котиби ҳисобланади.

6. Мактаб-интернатга жорий ўқув йилида 4-синфни тугатган ўқувчилар 5-синфга танлов асосида қабул қилинади.

7. Мактаб-интернатга кириш учун 25 июндан 8 августгача (шу кун ҳам) қуйидаги ҳужжатлар қабул қилинади:

таълим йўналиши ва ўқув тили кўрсатилган ҳолдаги ота-онасининг аризаси;

ўзлаштириш баҳолари табели;

№ 086-У шакл бўйича тиббий маълумотнома;

турар жойдан маълумотнома;

3,5 x 4,5 см. ҳажмдаги 6 та фотосурат;

туғилганлик тўғрисидаги гувоҳнома ва нусхаси;

футболчи паспорти — Болалар ва ўсмирлар спорт мактабларида шугулланганлар учун.

III. Танлов имтиҳонларини ўтказишни ташкил этиш

8. Танлов имтиҳонларини ўтказиш учун имтиҳонларни ўтказиш ҳайъати ташкил этилади. Имтиҳонларни ўтказиш ҳайъати таркиби қабул ҳайъати раиси томонидан тасдиқланади.

9. Танлов имтиҳонларида иштирок этган ўқувчиларнинг билими ихтисослик имтиҳонлари ва умумтаълим фанлари бўйича тест синовлари асосида баҳоланади.

Мактаб-интернатга синовлардан юқори балл тўплаган ўқувчилар қабул қилиш квотасига мувофиқ ўқишга қабул қилинади.

10. Танлов имтиҳонларнинг натижалари бўйича қайдномалар тўлдирилиб, қайдномалар қабул ҳайъати раиси ва аъзолари томонидан имзоланади.

IV. Ихтисослик имтиҳонлари синовларини ўтказиш тартиби

11. Ихтисослик бўйича имтиҳонлари 11 августдан 16 августгача (шу кун ҳам) ўтказилади ва ҳар бир синов натижалари ўтказилган куннинг эртасидан кечиктирмай ўқувчиларга эълон қилинади.

12. Антропометрик (оғирлиги ва бўйи) маълумотлар, функционал имкониятлар ва саломатликдаги нуқсонларни аниқлаш бўйича шифокор назоратидан ўтган ўқувчиларга ихтисослик имтиҳонларини топшириш учун рухсат этилади. Ихтисослик имтиҳонлари ўқувчининг антропометрик (оғирлиги ва бўйи) кўрсаткичлари, функционал имкониятлари ва соғлиғидаги камчиликларни аниқлаш мақсадида 9-10 август кунлари вилоят, туман, шаҳар жисмоний тарбия, тиббиёт диспансери билан мактаб-интернатнинг мурабий-ўқитувчилари томонидан амалга оширилади.

13. Ўқувчининг жисмоний ривожланганлиги ва функционал тайёргарлик кўрсаткичлари мазкур Низомнинг 1-илоvasида белгиланган баллар асосида баҳоланади.

Ўқувчининг ихтисослик имтиҳонлари умумий жисмоний тайёргарлик, махсус жисмоний тайёргарлик, ўйин фаолияти бўйича ўтказилади.

14. Ўқувчилар топширадиган имтиҳонлари ҳамда умумий, махсус жисмоний тайёргарлик ва ўйин фаолиятини баҳолашнинг ягона меъёрлари Ўзбекистон Республикаси Маданият ва спорт ишлари вазирлиги ҳамда Ўзбекистон футбол Федерацияси томонидан 2-иловага мувофиқ ишлаб чиқилиб тасдиқланади.

15. Ўқувчилар танлов натижаларида тўплаган умумий баллари асосида баҳоланади.

V. Умумтаълим фанлари бўйича тест синовларини ўтказиш тартиби

16. Ўқувчиларни умумтаълим фанлари бўйича (математика ва она тили) билимини баҳолаш тест синовларидан иборат. Тест саволлари бошланғич таълим дастури асосида ҳар бир фандан 30 та саволдан, қабул ҳайъати томонидан ишлаб чиқилади. Ҳар бир тўғри жавоб 3 балл билан баҳоланади. Умумтаълим фанлари бўйича тест синовларига ҳар бир фан учун 90 дақиқа вақт ажратилади.

17. Умумтаълим фанлари бўйича тест синовлари 17-18 август кунлари ўтказилади. Умумтаълим фанлари бўйича тест синов натижалари ўтказилган куннинг эртасидан кечиктирмай махсус жойларга осиб қўйилади.

VI. Ўқувчиларни танлов имтиҳонлари натижаларини ўтказиш ва қабул қилиш

18. Ихтисослик имтиҳон натижалари ва умумтаълим фанлари бўйича тест синов натижалари 20 августдан кечиктирмасдан махсус жойларга осиб қўйилади.

19. Мактаб-интернат томонидан 25 августдан кечиктирмай қабул қилинган ўқувчилар тўғрисида буйруқ чиқарилади.

20. Танлов имтиҳонлари натижаларига кўра, ўқувчилар ёки уларнинг ота-оналари норозилик аризасини бериш ҳуқуқига эгалар.

VII. Ўқувчининг жисмоний ва махсус тайёргарлигини ўрганиш ва бўш қолган ўринларга ўқувчиларни қабул қилиш

21. Ўқувчиларнинг жисмоний ва махсус тайёргарлигини ўрганиш ўқув йили давомида бир марта ўзлаштиролмаётган ўқувчиларни аниқлаш мақсадида ўтказилади.

22. Ўқувчиларнинг жисмоний ва махсус тайёргарлигини ўрганиш Ўзбекистон Республикаси Халқ таълими вазирлигининг буйруғи билан тасдиқланган махсус ҳайъат аъзолари томонидан амалга оширилади.

23. Махсус ҳайъат ўқувчиларнинг жисмоний ва махсус тайёргарлигини ўрганишда ўқувчиларнинг жисмоний ва махсус тайёргарлик меъёрларини бажара олишларига эътибор қаратади.

Махсус ҳайъат томонидан ўрганиш натижасига кўра жисмоний ва махсус тайёргарлик меъёрларини ўзлаштираолмаган деб топилган ўқувчилар педагогик кенгаш қарори асосида четлаштирилади ва аввал ўқиган мактабга қайтариб юборилади (ўқувчининг яшаш жойи ўзгарган шароитда тегишли ҳудуддаги бошқа мактабга). Бунда, истисно тариқасида, 5 синф ва 9 синф ўқувчилари четлатилмайди.

24. Бўшаб қолган ўринларга ўқувчиларни қабул қилиш мазкур Низомда белгиланган тартибда ўқув йилининг 1-ярим йиллигидагина амалга оширилади.

25. Ўқувчиларнинг синов нормативлари Ўзбекистон Республикаси Халқ таълими вазирлиги, Маданият ва спорт ишлари вазирлиги, Ўзбекистон футбол Федерацияси томонидан ишлаб чиқилади ва тасдиқланади.

VIII. Яқуний қоидалар

26. Мазкур Низом талабларини бузишда айбдор бўлган шахс қонун ҳужжатларига мувофиқ жавобгар бўлади.

27. Мазкур Қоидалар Ўзбекистон Республикаси Маданият ва спорт ишлари вазирлиги, Футбол федерацияси ҳамда Соғлиқни сақлаш вазирлиги билан келишилган.

*Маданият ва спорт
ишлари вазири*

А. ЖАББОРОВ

2009 йил 5 август

*Футбол федерацияси
президенти*

М. УСМОНОВ

2009 йил 5 август

Соғлиқни сақлаш вазири

А. ИКРОМОВ

2009 йил 5 август

Футбол бўйича давлат ихтисослаштирилган
мактаб-интернатларига ўқувчилар қабул
қилиш тартиби тўғрисидаги низомга
1-ИЛОВА

Назорат синовларини баҳолаш тахминий МЕЗОНЛАРИ

1. 5-синфга кириш учун ўқувчиларнинг умумий жисмоний тайёргарлигини баҳолаш мезони.

Умумий жисмоний тайёргарликни баҳолашнинг тахминий мезонлари:

Т/р	Назорат синовлари	10 ёш					11 ёш				
		30 б.	25 б.	20 б.	15 б.	10 б.	30 б.	25 б.	20 б.	15 б.	10 б.
1.	30 м га югуриш (сек)	5,3	5,4	5,5	5,6	5,7	5,1	5,2	5,3	5,4	5,5
2.	300 м га югуриш (сек)	60,0	61,0	62,0	63,0	64,0	59,0	60,0	61,0	62,0	63,0
3.	Жойидан узунликка сакраш (см)	160	150	140	130	120	170	160	150	140	130

Ўқувчиларнинг умумий жисмоний тайёргарлигини баҳолаш учун максимал балл — 90 баллга тенг.

Назорат синовларини бажариш тартиби:

300 м га югуриш — машқ енгил атлетика бўйича мусобақа қоидаларига асосан бажарилади. Югуриш юқори стартдан амалга оширилади. Битта уринишга йўл қўйилади;

30 м га югуриш юқори стартдан — икки даъвогар «стартга», «Диққат», «Марш» сигнали билан стартни бошлайдилар. Икки уриниш бажарилади, яхши натижа ҳисобга олинади;

жойидан узунликка сакраш — даъвогар назорат чизиғи ортида туради. Унинг ён томонига (полга) 3 м ли бўлинмаган шкала чизилади. Ўлчаш сакраш узунлигини ҳисоблашнинг умум қабул қилинган қоидалар асосида ўтказилади. Икки уриниш бажарилади, яхши натижа ҳисобга олинади.

2. 5-синфга кириш учун ўқувчиларнинг махсус жисмоний тайёргарлигини баҳолаш мезонлари.

Махсус жисмоний тайёргарликни баҳолашнинг тахминий меъёрлари:

Т/р	Назорат синовлари	10 ёш					11 ёш				
		25 б.	20 б.	15 б.	10 б.	5 б.	25 б.	20 б.	15 б.	10 б.	5 б.
1.	Тўпни бош ортидан отиш (АУТ) (м)	13	12	11	10	9	14	13	12	11	10
2.	Жанглировка (марта)	15	13	11	9	7	17	15	13	11	9
3.	«Саккизлик» (сек)	18,5	19,5	20,5	21,5	22,5	17,5	18,5	19,5	20,5	21,5
4.	«Слалом» (сек)	9,0	10,0	11,0	12,0	13,5	7,5	8,5	9,5	10,5	11,5


Ўқувчиларни махсус жисмоний тайёргарлигини баҳолаш учун максимал балл — 100 баллга тенг.

Назорат синовларини бажариш тартиби:


тўпни бош ортидан отиш — футбол ўйинига мувофиқ 2 метрли йўлак (коридор) бўйлаб бажарилади. Йўлак ташқарисига тушган тўп ҳисобга олинмайди. Икки уриниш учун имкон берилади, яхши натижа қайд этилади:

тўпни ерга туширмасдан оёқда ўйнатиш (Жанглировка) — ўнг ва чап оёқлар (кафт устининг ўртаси, ички, ташқи қисми), сон, бош билан зарбалар берилади. Зарбалар исталган тартибда, бир хил зарбани кетма-кет икки мартадан ортиқ такрорламаган ҳолда бажарилади.

«Саккизлик» тести — бешта футбол устунни бир-биридан 10 м масофада квадрат шаклида ўрнатилади, битта устун ўртада бўлади. Дастлабки «Диккат» буйруғи берилади. Кейин «Марш» буйруғи билан даъвогар тўп билан 1-сонли устундан 2-сонли устунга тезлик билан югуради, уларни айланиб ўтиб, 3 ва 4-сонли устунлар томон йўналади, 4-сонли устунни айланиб ўтиб, ўйинчи тўпни 2-сонли устунга олиб боради, кейин 5-сонли устундан ўтиб 1-сонли устун ёнида тўхтади. Машқни бажариш учун сарфланган вақти ҳисобга олинади. Иккита уринишга имкон берилади, яхши натижа қайд этилади.



«Слалом» тести — тўпни ҳар 5 метрга ўрнатилган учта устун орасидан аввал у томонга, кейин бу томонга олиб юриш:



3. 5-синфга кириш учун ўқувчиларнинг ўйин фаолиятини баҳолаш мезонлари.

Ўқувчи-спортчининг ўйин фаолиятига баҳо бериш унинг бажарган самарали ҳаракатларини ҳисобга олиш билан белгиланади.

Ўйин фаолиятидаги техник-тактик ҳаракатларни баҳолашда ўқувчининг шериклари билан ўзаро муносабати, дарвозага зарба бериши, рақибни алдаш каби қобилиятларига алоҳида эътибор берилади.

Ўйин фаолиятини баҳолаш тахминий мезонлари:

Т/р	Ўйин фаолияти кўрсаткичлари	50 б.	40 б.	30 б.	20 б.	10 б.
1.	Техник-тактик ҳаракатлар миқдори	30 та	25 та	20 та	15 та	10 та
2.	Техник-тактик ҳаракатлар самарадорлиги	50	40	35	30	25

Ўқувчилар ўйин фаолиятини баҳолаш учун максимал балл — 100 балл.

Футбол бўйича давлат ихтисослаштирилган
мактаб-интернатларига ўқувчилар қабул
қилиш тартиби тўғрисидаги низомга
2-ИЛОВА

Ўқувчининг жисмоний ривожланганлиги ва функционал тайёргарлигини баҳолаш МЕЗОНЛАРИ

Т/р	Кўрсаткичлар	25 б.	20 б.	15 б.	10 б.	5 б.
1.	Бўйи (см)	152	149	146	143	140
2.	Оғирлиги (кг)	40	38	36	34	32
3.	Оғирлик-бўй индекси Кесма г/см	263	255	246	238	228

Ўқувчининг жисмоний ривожланганлиги ва функционал тайёргарлигини баҳолаш учун максимал балл — 75 балл. Оғирликни (кг) граммга айлантирамиз, бўйига бўламиз (см).